

Совхозин библиотек

Сарпинск района, Чапаевин нертă совхозин библиотекиг, арв гар джилд эн кӱдлмшин халхар кӱдлсн, Михаил Николаевич Савин гардна.

Олнд кӱндтă ӱр Савин кеджăх кӱдлмшăн ӱнн седклăн тăвдж, цаган, чидлăн нӱл уга кенă. Библиотекд ирсн умшачнрт эн селвгăн ӱгч, сăн, таасгдх дегтр ӱгнă, мана орн-нутгин болн нарт делкăн олн келн амтнă бăадл-джиргълин тускар тасрхан уга кӱӱндвр кенă, умшачнрин сурврт хăрӱ ӱгнă, умшлгъ кенă. Ода эн библиотекд 150 умшачнр бачгддж гертăн умшх дегтр авна. Асханднь шин газетс, журналмуд ирдж умшцхана.

Михаил Николаевич совхозин фермсăр йовад, малчнрт шин дегтр, газет, журналмуд ӱгнă, олн-зӱсн тӱрмӱдăр, тер дотр Н. С. Хрущев США-р одсна тускар, эн йовдли чинрин

тускар цăалгъвр ӱгнă. Наукин, техникин, мана орн-нутгин эдл-ахун ӱӱдăн диилврин тускар цаг давулл уга кӱӱндвр кенă.

Совхозин 2-ч, 3-ч отделенъд умшлгъна хора бăанă. Зуг эн хорад малчнрт туста гегăн-герлин кӱдлмш кегдăд уга. Отделенъд бăадг агитатормуд совхозин библиотекăс дегтр, журналмуд, газетс авад малчнрт ӱгхăр седнă. Зуг эднинь тăвдг шкаф, стол уга болна. Эн умшлгъна хорад цаг давулл уга шкаф, стол тăвăд, малчнр ирăд шин газет, журнал, дегтр умшдгар, шатр, дӱӱв нааддгар кех кергтă.

Иигăд совхозин библиотекин кӱдлмшт дӱнъ болхла, цуг гегăн-герлин кӱдлмш улм сăанăр кегдхнь лавта.

С. ВАНЬКАЕВ.